

摘藻堂四庫全書薈要

集部

欽定四庫全書叢要

集部

樂府詩集卷五十四至  
六

詳校官候選知縣臣吳甸華



欽定四庫全書薈要卷一萬九千七百六十七

集部

樂府詩集卷五十四

宋 郭茂倩 編

 舞曲歌辭

雜舞

齊鼙舞曲

明君辭

南齊書樂志曰漢章帝造鼙舞歌云闕東

有賢女魏明帝代漢曲云明明魏皇帝傅  
玄代魏曲作晉洪業篇云宣文創洪業盛  
德存泰始聖皇應靈符受命君四海今前  
四句錯綜其辭從五帝至不可階六句全  
玄辭後二句本云將復御龍氏鳳凰在庭  
棲又改易焉

明君創洪業盛德在建元受命君四海聖皇應靈乾五  
帝繼三皇三皇世所歸聖德應期運天地不能違仰之

彌已高猶天不可階將復結繩化靜拱天下齊

聖主曲辭

聖主受天命應期則虞唐升旒綜萬機端宸馭八方盈  
虛自然數揖讓歸聖明北化陵河塞南威越滄溟廣德  
齊七政敷教騰三辰萬寓必承慶百福咸來臻聖皇應  
福始昌德洞祐先

明君辭

明君御四海總鑒盡人靈仰成恩已洽竭忠身必榮聖

澤洞三靈德教被八鄉草木變柯葉川嶽洞嘉祥愉樂  
盛明運舞蹈升太時微霜永昌命軌心長歡怡

梁鞞舞歌

沈約

隋書樂志曰梁三朝樂第十七設鞞舞唐  
書樂志曰明君本漢世鞞舞曲梁武帝時  
改其辭以歌君德

大梁七百始天監三元初聖功澄宇縣帝德總車書熙  
熙億兆臣其志皆懽愉

刑措甫自今隆平亦肇茲神武超楚漢安用道邠岐百  
拜奄來宅執玉咸在斯象天則地體無為

禮緝民用擾樂諧風自移舜琴中已絕堯衣今復垂象  
天則地體無為

治兵戰六獸為邦命九官靈蛇及瑞一作祥羽分素復銜

丹

望就踰軒頊鏗鏘掩咸獲九尾擾成羣八象鳴相顧象  
天則地化雲布

有為臣所執司契君之道運行乃四時無言信蒼昊宸  
居體冲寂忘懷定天保

至德同自然裁成侔玄造珍祥委天貺靈物開地寶窈  
窕降青琴參差秀朱草

右明之君

梁鞞舞歌

周捨

赫矣明之君我皇邁前古機靈通日月聖敬締區宇淮  
海無橫波文軌同一土樂哉太平世當歌復當舞



右明之君

聖主應圖籙天下咸所歸端宸臨赤縣宸居法紫微遐  
方奉正朔外戶闢重扉我君延萬壽福祚長巍巍

右聖主曲

明君班五瑞就日朝百王充庭植鷺羽鈞天奏清商本  
支同中嶽良臣安四方盛明普日月兆民樂未央

石明君曲

鐸舞歌詩

唐書樂志曰鐸舞漢曲也古今樂錄曰鐸舞者所持也木鐸制法度以號令天下故取以為名今謂漢世諸舞鞞中二舞是漢事鐸拂二舞以象時古鐸舞曲有聖人制禮樂一篇聲辭雜寫不復可辨相傳如此魏曲有太和時晉曲有雲門篇傳玄造以當魏曲齊因之梁周捨改其篇隋書樂志曰鐸舞傳玄代魏辭云振鐸鳴金是也梁

三朝樂第十八設鐸舞

聖人制禮樂篇

古辭

昔皇文武邪彌彌舍善誰吾時吾行許帝道銜來治路  
萬邪治路萬邪赫赫意黃運道吾治路萬邪善道明邪  
金邪善道明邪金邪帝邪近帝武武邪邪聖皇八音偶  
邪尊來聖皇八音及來儀邪同邪烏及來義邪善草供  
國吾咄等邪烏近帝邪武邪近帝武邪武邪應節合用  
武邪尊邪應節合用酒期義邪同邪酒期義邪善草供

國吾咄等邪烏近帝邪武邪近帝武武邪邪下音足木  
上為鼓義邪應衆義邪樂邪邪延否已邪烏已禮祥咄  
等邪烏素女有絕其聖烏烏武邪

雲門篇

傳 玄

黃雲門唐咸池虞韶舞夏夏殷濩列代有五振鐸鳴金  
延大武清歌發唱形為主聲和八音協律呂身不虛動  
手不徒舉應節合度周其叙時奏宮角雜之以徵羽下  
饜衆目上從鐘鼓樂以移風與德禮相輔安有失其所

右二曲

齊鐸舞歌

南齊書樂志曰鐸舞歌一曲傳玄辭以代  
魏太和時徵用之除下厭衆目上從鍾鼓  
二句

黃雲門唐咸池虞韶舞夏夏殷漢列代有五振鐸鳴金  
延太武清歌發唱形為主聲和八音協律呂身不虛動  
手不徒舉應節合度周其序時奏宮角雜之以徵羽樂

以移風禮相輔安有失其所

右一曲

梁鐸舞曲

周捨

雲門且莫奏咸池且莫歌  
我后興至德樂頌發中和  
白雲紛已隆萬舞鬱駢羅  
功成聖有作黃唐何足多

右一曲

巾舞歌詩

古辭

唐書樂志曰公莫舞晉宋謂之巾舞其說

云漢高祖與項籍會鴻門項莊舞劍將殺

高祖項伯亦舞以袖隔之且語莊云公莫  
舞古人相呼曰公言公莫害漢王也漢人  
德之故舞用巾以像項伯衣袖之遺式宋  
書樂志曰按琴操有公莫渡河然則其聲  
所從來已久俗云項伯非也古今樂錄曰  
巾舞古有歌辭訛異不可解江左以來有  
歌舞辭沈約疑是公無渡河曲今三調中

自有公無渡河其聲哀切故入瑟調不容  
以瑟調雜于舞曲惟公無渡河古有歌有  
弦無舞也

吾不見公莫時吾何嬰公來嬰媵時吾哺聲何為茂時  
為來嬰當恩吾明月之土轉起吾何嬰土來嬰轉去吾  
哺聲何為土轉南來嬰當去吾城上羊下食草吾何嬰  
下來吾食草吾哺聲汝何三年針縮何來嬰吾亦老吾  
平平門淫涕下吾何嬰何來嬰涕下吾哺聲昔結吾馬



客來嬰吾當行吾度四州洛四海吾何嬰海何來嬰四  
海吾哺聲煬西馬頭香來嬰吾洛道五吾五丈度汲水  
吾噫邪哺誰當求兒母何意零邪錢健步哺誰當吾求  
兒母何吾哺聲三針一發交時還弩心意何零意弩心  
遙來嬰弩心哺聲復相頭巾意何零何邪相哺頭巾相  
吾來嬰頭巾母何何吾復來推排意何零相哺推相來  
嬰推非母何吾復車輪意何零子以邪相哺轉輪吾來  
嬰轉母何吾使君去時意何零子以邪使君去時使來

嬰去時毋何吾思君去時意何零子以邪思君去時思  
來嬰吾去時毋何何吾吾

齊公莫舞辭

南齊書樂志曰晉公莫舞歌二十章章無  
定句前是第一解後是第十九二十解雜  
有三句並不可曉解建武初明帝奏樂至  
此曲言是似永明樂流涕憶世祖云

吾不見公莫時吾何嬰公來嬰姥時吾思君去時吾何

零子以邪思君去時思來嬰吾去時毋那何去吾

右一曲

公莫辭歌

李賀

方花古

一作石

礎排九楹刺豹淋血盛銀鬕華

一作軍

筵鼓

吹無桐竹長刀直立割鳴箏橫桴麤錦生紅緯日炙錦

媽王未醉腰下三看寶玦光項莊掉箭攔前起材官小

臣公莫舞座上真人赤龍子芒碭雲端抱天回咸陽王

氣清如水鐵樞鐵棣重東闕大旗五丈撞雙環漢王今

日須秦印絕臙割腸臣不論

晉拂舞歌詩

晉書樂志曰拂舞出自江左舊云吳舞也  
晉曲五篇一曰白鳩二曰濟濟三曰獨祿  
四曰碣石五曰淮南王齊多刪舊辭而因  
其曲名古今樂錄曰梁拂舞歌並用晉辭  
樂府解題曰讀其辭除白鳩一曲餘並非  
吳歌未知所起也

白鳩篇

南齊書樂志曰白符鳩舞出江南吳人所造其歌本云平平白符思我君惠集我金堂言白者金行符合也鳩亦合也符鳩雖異其義是同宋書樂志曰晉楊泓舞序云自到江南見白符舞或言白鳬鳩舞云有此來數十年矣察其辭旨乃是吳人患孫皓虐政思屬晉也晉辭曰翩翩白鳩載飛

載鳴懷我君德來集君庭蓋晉人改其本

歌云

翩翩白鳩載飛載鳴懷我君德來集君庭白雀呈瑞素  
羽明鮮翔庭舞翼以應仁乾皎皎鳴鳩或丹或黃樂我  
君惠振羽來翔東壁餘光魚在江湖惠而不費敬我微  
軀策我良駟習我驅馳與君周旋樂道忘飢我心虛靜  
我志霑濡彈琴鼓瑟聊以自娛凌雲登臺浮遊太清扳  
龍附鳳目望身輕

濟濟篇

暢飛暢舞氣流芳追念三五大綺黃去失有時可行去  
來同時此未央時冉冉近桑榆但當飲酒為歡娛衰老  
逝有何期多憂耿耿內懷思淵池廣魚獨希願得黃浦  
衆所依恩感人世無比悲歌且舞無極已

獨漉篇

獨漉一作獨祿南齊書樂志曰古辭明君  
曲後云勇安樂無慈不問清與濁清闕與

無時濁邪交與獨祿伎錄曰求祿求祿清  
白不濁清白尚可貪汙殺我晉歌為鹿字  
古通用也疑是風刺之辭

獨漉獨漉水深泥濁泥濁尚可水深殺我雍雍雙雁遊  
戲田畔我欲射雁念子孤散翩翩浮萍得風搖輕我心  
何合與之同并空牀低帷誰知無人夜衣錦繡誰別偽  
真刀鳴削中倚牀無施父冤不報欲活何為猛虎班班  
遊戲山間虎欲齧人不避豪賢



# 碣石篇

南齊書樂志曰碣石魏武帝辭晉以為碣石舞其歌四章一曰觀滄海二曰冬十月三曰土不同四曰龜雖壽樂府解題曰碣石篇晉樂奏魏武帝辭首章言東臨碣石見滄海之廣日月出入其中二章言農功畢而商賈往來三章言鄉土不同人性各異四章言老驥伏櫪志在千里烈士暮年

壯心不已也按相和大曲步出夏門行亦有碣石篇與此並同但曲前更有豔爾

東臨碣石以觀滄海水何澹澹山島竦峙樹木叢生百草豐茂秋風蕭瑟洪波湧起日月之行若出其中星漢粲爛若出其裏幸甚至哉歌以詠志

右觀滄海

孟冬十月北風徘徊天氣肅清繁霜霏霏鷓鴣雞晨鳴雁過南飛鷺鳥潛藏熊羆窟棲錢鏹一作鏹傳置農收積場

逆旅整設以通賈商幸甚至哉歌以詠志

右冬十月

鄉土不同河朔隆寒流澌浮漂舟船行難雖不入地豐  
籟深與水竭不流水堅可蹈士隱者貧勇俠輕非心常  
歎怨戚戚多悲幸甚至哉歌以詠志

右土不同

神龜雖壽猶有竟時騰蛇乘霧終為土灰老驥伏櫪志  
在千里烈士暮年壯心不已盈縮之期不但在天養怡

之福可得永年幸甚至哉歌以詠志

右龜雖壽

淮南王篇

崔豹古今注曰淮南王淮南小山之所作也淮南王服食求仙遍禮方士遂與八公相攜俱去莫知所往小山之徒思戀不已乃作淮南王曲馬班固漢武帝故事曰淮南王安好神仙招方術之士能為雲雨百

姓傳云淮南王得天子壽無極帝心惡之  
使硯王云能致仙人與共遊處變化無常  
又能隱形飛行服氣不食帝聞而喜欲受  
其道王不肯傳帝怒將誅焉王知之出令  
與羣臣因不知所之樂府解題曰古詞云  
淮南王自言尊實言安仙去

淮南王自言尊百尺高樓與天連後園鑿井銀作牀金  
瓶素縷汲寒漿汲寒漿飲少年少年窈窕何能賢揚聲

悲歌音絕天我欲渡河河無梁願化雙黃鵠還故鄉還  
故鄉入故里徘徊故鄉苦身不已繁舞寄聲無不泰徘  
徊桑梓遊天外

樂府詩集卷五十四

欽定四庫全書薈要卷一萬九千七百六十八

舞部

樂府詩集卷五十五

宋 郭茂倩 編

舞曲歌辭

雜舞

齊拂舞歌

白鳩辭

晉白鳩舞歌七解齊樂所奏是最前一解

翩翩白鳩再飛再鳴懷我君德來集君庭

右一曲

濟濟辭

南齊書樂志曰晉濟濟舞歌六解齊樂所  
奏是最後一解按晉書樂志是最前一解  
疑齊書之誤

暢飛暢舞氣流芳追念三五大綺黃

右一曲



獨祿辭

南齊書樂志曰晉獨鹿歌六解齊樂所奏  
是最前一解

獨祿獨祿水深泥濁泥濁尚可水深殺我

右一曲

碣石辭

南齊書樂志曰晉碣石舞歌四章齊樂所  
奏是前一章

東臨碣石以觀滄海水河淡淡山島竦峙樹木叢生百  
草豐茂秋風蕭瑟洪波湧起日月之行若出其中星漢  
粲爛若出其裏幸甚至哉歌以言志

右一曲

淮南王辭

南齊書樂志曰晉淮南王辭歌六解齊樂  
所奏前是第一解後是第五解

淮南王自言尊百尺高樓與天連我欲渡河河無梁願

作雙黃鵠還故鄉

右一曲

梁拂舞歌

古今樂錄曰梁三朝樂第十九設拂舞

翩翩白鳩再飛再鳴懷我君德來集君庭  
曖曖鳴球或丹或黃樂我君恩振羽來翔

拂舞歌

拂舞辭

李賀

吳娥聲絕天空雲閒徘徊門外滿車馬亦須生綠苔樽  
有烏程酒勸君千萬壽全勝漢武錦樓上曉望晴寒飲  
花露東方日不破天光無老時丹成作蛇乘白霧千年  
重化玉井龜從蛇作龜二千載一作玉井  
龜二千載吳堤綠草年  
年在背有八卦稱神仙邪鱗頑甲滑腥涎

白鳩辭

鸞白

古今樂錄曰鞞鐸巾拂四舞梁並夷則格  
鍾磬鳩拂和故白擬之為夷則格上白鳩

拂舞辭云

鏗鳴鍾考朗鼓歌白鳩引拂舞白鳩之白誰與鄰霜衣  
雪襟誠可珍含哺七子能平均食不咽性安馴首農政  
鳴陽春天子刻玉杖鏤形賜耆人白鷺一作鷹亦白非純

真外潔其色心匪仁闕五德無司晨胡為啄我葭下之  
紫鱗鷹鷂鵠鵠貪而好殺鳳凰雖大聖不願以為臣

獨漉篇

李白

獨漉水中泥水濁不見月不見月尚可水深行人沒越

鳥從南來胡鷹亦北度我欲彎弓向天射惜其中道失  
歸路落葉別樹飄零隨風客無所託悲與此同羅帷舒  
卷似有人開明月直入無心可猜雄劍挂壁時時龍鳴  
不斷犀象繡澀苔生國恥未雪何由成名神鷹夢澤不  
顧鵠鳶為君一擊搏鵬九天

獨漉歌

王建

獨獨漉漉鼠食猫肉烏日中鶴露宿黃河水直人心曲

臨碣石

沈約

碣石送返潮登梁禮朝日溟漲無端倪山島互崇嶧驥  
老心未窮酬恩豈終畢

小臨海

劉孝威

碣石望山海留連降尊極秦帝枉鉤陳漢家增禮飾石  
橋終不成桑田竟難測蜃氣遠生樓鮫人近潛織空勞  
帝女填詎動波神色

淮南王二首

鮑照

淮南王好長生服食鍊氣讀仙經琉璃藥椀牙作盤金

鼎玉七合神丹合神丹賜紫房紫房綵女弄明璫鸞歌  
鳳舞斷君腸朱門九重一作朱城九重門九閨願逐明月入君  
懷入君懷結君佩怨君恨君恃君愛築城思堅劍思利  
同盛同衰莫相棄

晉白紵舞歌詩

宋書樂志曰白紵舞按舞辭有巾袍之言  
紵本吳地所出宜是吳舞也晉俳歌云皎  
皎白緒節節為雙吳音呼緒為紵疑白緒



即白紵也南齊書樂志曰白紵歌周處風

土記云吳黃龍中童謠云行白者君追汝

句驪馬後孫權征公孫淵浮海乘船舶白

也今歌和聲猶云行白紵焉樂府解題曰

古詞盛稱舞者之美宜及芳時為樂其譽

白紵曰質如輕雲色如銀製以為袍餘作

巾袍以光軀中拂塵唐書樂志曰梁武帝

令沈約改其辭為四時白紵歌今中原有

白紵曲辭旨與此全殊

輕軀徐起何洋洋高舉兩手白鵲翔宛若龍轉乍低昂  
凝停善睐容儀光如推若引留且行隨世而變誠無方  
舞以盡神安可忘晉世方昌樂未央質如輕雲色如銀  
愛之遺誰贈佳人制以為袍餘作巾袍以光軀巾拂塵  
麗服在御會佳賓醪醴盈樽美且淳清歌徐舞降祇神  
四座歡樂胡可陳

右一篇

雙袂齊舉鸞鳳翔羅裾飄飄昭儀光趨步生姿進流芳  
鳴弦清歌及三陽人生世間如電過樂時每少苦日多  
幸及良辰耀春華齊倡獻舞趙女歌羲和馳景逝不停  
春露未晞嚴霜零百草凋索花落英蟋蟀吟牖寒蟬鳴  
百年之命忽若傾早知迅速秉燭行東造扶桑遊紫庭  
西至崑崙戲曾城

右一曲

陽春白日風花香趨步明玉舞瑤璫聲發金石媚笙簧

羅袿徐轉紅袖揚清歌流響繞鳳梁如矜若思凝且翔  
轉盼遺精豔輝光將流將引雙雁行歡來何晚意何長  
明君御世永歌昌

右一曲

宋白紵舞歌詩

宋書樂志曰白紵舞歌詩舊新合三篇二  
篇與晉辭同其一篇異

高舉兩手白鵠翔輕軀徐起何洋洋凝停善矚容儀光

宛若龍轉乍低昂隨世而變誠無方如推若引留且行  
宋世方昌樂未央舞以盡神安可忘愛之遺誰贈佳人  
質如輕雲色如銀袍以光軀巾拂塵制以為袍餘作巾  
四座歡樂胡可陳清歌徐舞降祇神

右一篇

齊白紵舞歌詩

王儉

陽春白日風花香趨步明月舞瑤裳  
情發金石媚笙簧羅袿徐轉紅袖揚

清歌流響繞鳳梁如驚若思凝且翔  
轉盼流精豔輝光將流將引雙雁行  
歡來何晚意何長明君馭世永歌昌

右五曲

梁白紵辭二首

武帝

古今樂錄曰梁三朝樂第二十設巾舞并  
白紵蓋巾舞以白紵四解送也

朱絲玉柱羅象筵飛瑄促節舞少年短歌流目未肯前

含笑一轉私自憐

纖腰嫋嫋不任衣  
嬌怨獨立特為誰  
赴曲君前未忍歸  
上聲急調中心飛

白紵舞辭

白紵曲

劉鑠

僊僊徐動何盈盈  
玉腕俱凝若雲行  
佳人舉袖耀青蛾  
摻摻擢手映鮮羅  
狀似明月汎雲河  
體如輕風動流波

白紵歌六首

鮑照

吳刀楚製為佩褱，織羅霧縠垂羽衣。含商咀徵歌露晞。

珠屐

一作履

颯沓紈袖飛，淒風夏起素雲迴。車怠馬煩客

忘歸，蘭膏明燭承夜暉。

桂宮柏寢

一作梁

擬天居，朱爵文牕鞞綺

一作蹄

疏象床瑤

席鎮犀渠雕屏鈴

一作區

匝組帷舒秦箏，趙瑟挾笙等垂

璫散珮

一作綬

盈玉除，停觴不語欲誰須。

三星參差露沾溼，弦悲管清月將入。寒光蕭條候蟲急。

荆王流歎

一作歡

楚妃泣紅顏，難長時易戢。凝華結藻

一作



彩久延立非君之故豈安集

池中赤鯉庖所捐琴高乘雲騰

一作飛

上天命逢福世丁

溢恩

一作微命逢福丁溢恩

簪金藉綺升曲筵思君厚德委如山

潔誠洗志期暮年烏白馬角寧足言

朱脣動素腕

一作袖

舉洛陽少童邯鄲女古稱淶水今白

紆催弦急管為君舞窮秋九月荷葉黃北風驅雁天雨

霜夜長酒多樂未央

春風澹蕩俠思多天色淨綠氣妍和桃含紅萼蘭

一作蓮

紫牙朝日灼爍發園花卷幌結帷羅玉筵齊謳秦吹盧  
女弦千金顧笑買芳年

同前二首

湯惠休

琴瑟未調心已悲任羅勝綺彊自持忍思一舞望所思  
將轉未轉恒如疑桃花水上春風出舞袖逶迤鸞照日  
徘徊鶴轉情艷逸君為迎歌心如一

少年窈窕舞君前容華艷艷將欲然為君嬌凝復遷延  
流目送笑不敢言長袖拂面心自煎願君流光及盛年

同前九首

張率

歌兒流唱聲欲清舞女趨節體自輕歌舞並妙會人情  
依弦度曲婉盈盈揚蛾為態誰目成

妙聲屢唱輕體飛流津染面散芳菲俱動齊息不相違  
令彼嘉客澹忘歸時久翫夜明星稀

日暮塞門望所思風吹庭樹月入帷涼陰既滿草蟲悲  
誰能離別長夜時流歎不寢淚如絲與君之別終何知  
秋風蕭鳴一作條露垂葉空閨光盡坐愁妾獨向長夜淚

承睫山高水遠路難涉望君光景何時接

遙夜方遠時既寒秋風蕭瑟白露團佳期不待歲欲闌  
念此遲暮獨無歡鳴弦流管增長歎

夜寒湛湛夜未央華燈空爛月懸光從風衣起發芬香  
為君起舞幸不忘

列坐華筵紛羽爵清曲未終月將落歌舞及時酒常酌  
無令朝露坐銷鑠

愁來一作多夜遲猶歎息撫枕思君終反仄金翠釵環稍

不飾霧縠流黃不能織但坐空閨思何極欲以短書寄  
飛翼

遙夜忘寐起長歎但望雲中雙飛翰明月入牖風吹幔  
終夜悠悠坐申旦誰能知我心中亂終然有懷歲方晏

白紵辭二首

崔國輔

洛陽梨花落如霰河陽桃葉生復齊坐恐玉樓春欲盡  
紅綿粉絮裛妝啼

董賢女弟在椒風窈窕繁華貴後宮壁帶金釭皆翡翠

一朝零落變成空

同前二首

楊衡

玉纓翠珮雜輕羅  
香汗微漬朱顏酡  
為君起唱白紵歌  
清聲裊雲思繁多  
凝笳哀琴時相和  
金壺半傾芳夜促  
梁塵霏霏暗紅燭  
令君安坐聽終曲  
墜葉飄花難再復  
躡珠履步瓊筵  
輕身起舞紅燭前  
芳姿艷態妖且妍  
迴眸轉袖暗催弦  
涼風蕭蕭流水急  
月華泛艷紅蓮溼  
牽裙覽帶翻成泣

同前

李白

揚清歌

一作音

發皓齒北方佳人東鄰子旦吟白紵停淥

水長袖拂面為君起寒雲夜卷霜海空胡風吹天飄塞  
鴻玉顏滿堂樂未終館娃日落歌吹濛

月寒江清夜沈沈美人一笑千黃金垂羅舞縠揚哀音  
郢中白雪且莫吟子夜吳歌動君心動君心冀君賞願  
作天池雙鴛鴦一朝飛去青雲上

吳刀剪綵

一作綺

縫舞衣明妝麗服奪春輝揚眉轉袖若

雪飛傾城獨立世所稀  
激楚結風醉忘歸  
高堂月落燭已微  
玉釵挂纓君莫違

白紵歌二首

王建

天河漫漫北斗梁  
宮中烏啼知夜半  
新縫白紵舞衣成  
來遲邀得吳王迎  
低鬟轉面掩雙袖  
玉釵浮動秋風生  
酒多夜長夜未曉  
月明燈光兩相照  
後庭歌聲更窈窕  
館娃宮中春日暮  
荔枝木瓜花滿樹  
城頭烏棲休擊鼓  
青蛾彈瑟白紵舞  
夜天燿燿不見星  
宮中火照西江明



美人醉起無次第，墜釵遺佩滿中庭。此時但願可君意，  
回畫為宵亦不寐。年年奉君君莫棄。

同前

張籍

皎皎白紵白且鮮，將作春衫稱少年。裁縫長短不能定，  
自持刀尺向姑前。復恐蘭膏污纖指，常遣傍人收墮珥。  
衣裳著時寒食下，還把玉鞭鞭白馬。

同前

柳宗元

翠帷雙卷出傾城，龍劍破匣霜月明。朱唇掩抑悄無聲，

金簧玉磬宮中生  
下沈秋水激太清  
天高地迴凝日晶  
羽觴蕩漾何事傾

樂府詩集卷五十五

欽定四庫全書薈要卷一萬九千七百六十九

異部

樂府詩集卷五十六

宋 郭茂倩 編

舞曲歌辭

雜舞

四時白紵歌

沈 約

古今樂錄曰沈約云白紵五章敕臣約造

武帝造後兩句

春白紵

蘭葉參差桃半紅  
飛芳舞縠戲春風  
如嬌如怨狀不同  
含笑流眄滿堂中  
翡翠群飛飛不息  
願在雲間長比翼  
佩服瑤草駐容色  
舜日堯年懽無極

夏白紵

朱光灼爍照佳人  
含情送意遙相親  
嫣然宛轉亂心神  
非子之故欲誰因  
翡翠群飛飛不息  
願在雲間長比翼  
佩服瑤草駐容色  
舜日堯年懽無極

秋白紵

白露欲凝草已黃  
金瑱玉柱響洞房  
雙心一意俱徊翔  
吐情寄君君莫忘  
翡翠群飛飛不息  
願在雲間長比翼  
佩服瑤草駐容色  
舜日堯年懽無極

冬白紵

寒閨晝寢羅幌垂  
婉容麗心長相知  
雙去雙還誓不移  
長袖拂面為君施  
翡翠群飛飛不息  
願在雲間長比翼  
佩服瑤草駐容色  
舜日堯年懽無極

夜白紵

秦箏齊瑟燕趙女一朝得意心相許  
明月如規方襲予  
夜長未央歌白紵  
翡翠群飛飛不息  
願在雲間長比翼  
佩服瑤草駐容色  
舜日堯年懽無極

四時白紵歌

隋煬帝

東宮春

洛陽城邊朝日暉  
天淵池前春鶯歸  
含露桃花開未飛  
臨風楊柳自依依  
小苑花紅洛水綠  
清歌宛轉繁弦促

長袖逶迤動珠玉千年萬歲陽春曲

江都夏

梅黃雨細麥秋輕  
楓樹蕭蕭江水平  
飛樓倚觀軒若驚  
花簾羅帷當夏清  
菱潭落日雙鳬舫  
綠水紅妝兩搖漾  
還似扶桑碧海上  
誰肯空歌采蓮唱

四時白紵歌

虞茂

江都夏

長洲茂苑朝夕池  
映日含風結細漪  
坐當伏檻紅蓮枝

雕軒洞戶青蘋吹輕幌芳烟鬱金馥綺簷花簾桃李枝  
蘭苔翡翠恒相逐桂樹鴛鴦恒並宿

長安秋

露寒臺前曉露清昆明池水秋色明搖環動佩出曾城  
鷗弦鳳管奏新聲上林蒲桃合縹緲甘泉奇樹上蔥青  
玉人當歌理清曲婕妤好恩情斷還續

冬白紵歌

元稹

吳宮夜長宮漏歎簾幕四垂燈焰煖西施自舞王自管



雪紵翻翻鶴翎散促節牽繁舞腰嬾舞腰嬾王罷飲蓋  
覆西施鳳花錦身作匡牀臂為枕朝珮捉捉王晏寢酒  
醒聞報門無事子胥死後言為諱近王之臣諭王意共  
笑越王窮惴惴夜夜抱冰寒不睡

晉杯槃舞歌詩

宋書樂志曰槃舞漢曲也張衡舞賦云歷  
七槃而縱躡王粲七釋云七槃陳於廣庭  
顏延之云遞間關於槃扇鮑照云七槃起

長袖皆以七槃為舞也搜神記云晉太康中天下為晉世寧舞矜手以接杯槃而反覆之此則漢世唯有柝舞而晉加之以杯反覆也五行志曰其歌云晉世寧舞杯盤言接杯盤於手上而反覆之至危也杯盤者酒食之器也而名曰晉世寧者言晉世之士偷苟於酒食之間而其知不及遠晉世之寧猶杯槃之在手也唐書樂志曰漢

有盤舞晉世謂之杯盤舞樂府詩云妍袖  
陵七盤言舞用盤七枚也

晉世寧四海平普天安樂永大寧四海安天下歡樂治  
興隆舞杯盤舞杯盤何翩翩舉坐翻覆壽萬年天與日  
終與一左回右轉不相失箏笛悲酒舞疲心中慷慨可  
健兒樽酒甘絲竹清願令諸君醉復醒醉復醒時合同  
四坐歡樂皆言工絲竹音可不聽一舞此槃左右輕自  
相當合坐歡樂人命長人命長當結友千秋萬歲皆老

壽

右一篇

齊世昌辭

南齊書樂志曰晉杯槃舞歌十解第三解云舞杯槃何翩翩舉生翻覆壽萬年其第一解首句云晉世寧宋改為宋世寧惡其杯槃翻覆辭不復取齊改為齊世昌後一解辭同唐書樂志曰梁謂之舞槃伎唐隸

散樂部中隋書樂志曰梁三朝樂第二十  
一設舞槃伎

齊世昌四海安樂齊太平人命長當結久千秋萬歲皆  
老壽

右一曲

宋泰始歌舞曲辭

古今樂錄曰宋泰始歌舞十二曲一曰皇  
業頌歌自堯至楚元王高祖世載聖德二

曰聖祖頌三曰明君大雅四曰通國風五  
曰天符頌六曰明德頌七曰帝圖頌八曰  
龍躍大雅九曰淮祥風十曰宋世大雅十  
一曰治兵大雅十二曰白紵篇大雅

皇業頌

明帝

皇業弘德建帝運資勲融脩唐重盛軌胄楚載休風堯  
帝兆深祥元王衍遐慶積善傳上業祚福啟英聖衰數  
隨金祿登厯昌永命維宋垂光烈世美流舞咏

聖祖頌

聖祖惟高德積勲代晉歷永建享鴻基萬古盛音冊  
文績宸馭廣運崇帝聲衍德被仁祉留化洽民靈孝建  
締孝業允協天人謀宇內齊政軌宙表燭威流鍾管騰  
列聖彝銘貢重猷

明君大雅

虞 穌

明君應乾數撥亂紐積基民慶來蘇日國頌薰風詩天  
步或暫艱列蕃扇迷慝廟勝敷九伐神謨洞七德文教

洗昏俗武誼清稜英勲冠帝則萬壽永齊一作天

通國風

明帝

開寶業資賢昌謨明盛弼諧光烈武惟略景王勲南康  
華容變政文猛績爰著有左軍三王到氏文武贊丞相  
作輔屬伊旦沈柳宗侯皆珍亂秦始開運超百王司徒  
驃騎勲德康江安謨效殷誠彰劉沈承規功名揚慶歸  
我后祚無疆

天符頌

明帝



天符革運世誕英皇在館神炫既壯龍驤六鍾集表四  
緯駢光於穆配天永休厥祥

明德頌

明帝

明德孚教幽符麗紀山昂見奇醴液涵祉鵷鷺耀儀騶  
虞遊趾福延億祚慶流萬祀

帝圖頌

帝圖凝遠瑞美昭宣濟流月鏡鹿毳霜鮮甘露降和花  
雪表年孝德載衍芳風永傳

龍躍大雅

龍躍戎府玉耀蕃宮歲淹豫野璽屬嬪中江波澈映石  
柏開文觀毓花蘂樓凝景雲白鳥三獲甘液再呈嘉穗  
表沃連理協成德充動物道積通神宋業允大靈瑞方  
臻

淮祥風

淮祥應賢彥生翼贊中興致太平

宋世大雅

虞 穌

宋世寧在泰始醉酒歡飽德喜萬國朝上壽酒帝同天  
惟長久

治兵大雅

明帝

王命治兵有征無戰巾拂以淨醜類革面王儀振旅載  
戢在辰中虛巾拂四表靜塵

白紵篇大雅

在心曰志發言詩聲成于文被管絲手舞足蹈欣泰時  
移風易俗王化基琴角揮韻白雲舒簫韶協音神鳳來

拊擊和節詠在初章曲乍畢情有餘文同軌一道德行  
國靖民和禮樂成四縣庭響美勲英八列陞唱貴人聲  
舞飾麗華樂容工羅裳映一作皎日袂隨風金翠列輝蕙  
麝豐淑姿秀一作委體允帝衷

齊明王歌辭

王融

齊明王歌辭七曲王融應司徒教而作也  
一曰明王曲二曰聖君曲三曰淶水曲四  
曰採菱曲五曰清楚引六曰長歌引七曰

散曲

明王曲

明王日月照至樂天地和幸息雲門吹復歇咸池歌桂  
房金匏輦瑤軒絲石羅朱騏步躑躅玄鶴舞蹉跎露凝  
嘉草秀烟度醴泉波皇基方萬祀齊民樂如何

右一曲三解

聖君曲

聖君應昌歷景祚啟休期龍樓神睿道兔園仁義基海

金  
卷五十六  
蕩萬川集山崖百草滋盤苗成萃止渝韎異來思清明  
動離軫威惠一作懷被殊辭大哉君為后何羨唐虞時

右一曲三解

淶水曲

湛露改寒司文鶚變春旭瓊樹落晨紅瑤塘水初淶日  
霽沙溆明風動泉華燭遵渚泛蘭觴乘漪弄一作舞清曲  
斗酒千金輕寸陰百年促何用盡歡娛王度式如玉

右一曲三解

採菱曲

炎光銷玉殿涼風吹鳳樓雕輜

一作青輜

僚平隰朱櫂泊安

流金華妝翠羽鷁首畫飛

一作龍

舟荆姬採菱曲越女江

南謳騰聲翻葉靜發

一作散

響谷雲浮良時時一遇佳人

難再求

右一曲三解

清楚引

平原數千里飛觀鬱宮宮清月罔將曙浩露零中宵轉

葉渡沙海別羽自冰遼四面涌

一作通

寒色左右竟嚴飈

峭澗多榛梗京索久塵苗逝將憑神武奮劍盪遺妖

右一曲三解

長歌引

周雅聽休明齊德覲升平紫烟四時合黃河萬里清翠  
柳蔭通街朱闕臨高城方轂雷塵起接袖風雲生酣笑  
爭日夕絲管互逢迎徂年無促慮長歌有餘聲

右一曲三解



散曲

金枝湛明燎繡幕烈芳然層閨橫綠綺曠席緬朱纒楚  
調廣陵散瑟柱秋風弦輕裙中山麗長袖邯鄲妍徐歌  
駐行景迅節籥浮烟願言聖明主永永萬斯年

右一曲三解

唐功成慶善樂舞辭

唐太宗

一曰九功舞殿庭朝會所奏文舞也新唐  
書禮樂志曰太宗生於武功之慶善宮貞

觀六年幸之宴從臣賞賜閭里同漢沛宛  
帝歡甚賦詩呂才被之管弦名曰功成慶  
善樂以童兒六十四人冠進德冠紫袴褶  
長襖漆髻屣履而舞舊書樂志曰慶善樂  
太宗所造也名九功之舞舞蹈安徐以象  
文德洽而天下安樂也冬正享讌及國有  
大慶與七德舞偕奏于庭

壽丘唯舊跡鄴邑乃前基粵余承累聖懸弧亦在茲弱

齡逢運改提劒鬱匡時指麾八荒定懷柔萬國夷梯山  
盛入款駕海亦來思單于陪武帳日逐衛文櫬端宸朝  
四嶽無為任百司霜節明秋景輕冰結水湄芸黃遍原  
隰禾穎積京坻共樂還譙宴歡此大風詩

唐中和樂舞辭

唐德宗

唐會要曰貞元十四年德宗以中和節自  
製中和舞舞中成八卦又敘其舞曰朕以  
中春之首紀為令節象中和之容作中和

之舞按此曲盖因繼天誕聖樂而作也

芳歲肇佳節物華當仲春乾坤既昭泰烟景含氤氲德  
淺荷玄貺樂成思治人前庭列鍾鼓廣殿延羣臣八卦  
隨舞意五音轉曲新顧非咸池奏庶協南風薰式宴禮  
所重浹懽情必均同和諒在茲萬國希可親

霓裳辭十首

王建

一曰霓裳羽衣曲唐逸史曰羅公遠多祕  
術嘗與玄宗至月宮初以拄杖向空擲之

化為大橋自橋行十餘里精光奪目寒氣  
侵人至一大城公遠曰此月宮也仙女數  
百皆素練霓衣舞於廣庭問其曲曰霓裳  
羽衣帝曉音律因默記其音調而還回顧  
橋梁隨步而沒明日召樂工依其音調作  
霓裳羽衣曲一說曰開元二十九年中秋  
夜帝與術士葉法善遊月宮聽諸仙奏曲  
後數日東西兩川馳騎奏其夕有天樂自

西南來過東北去帝曰偶遊月宮聽仙曲

遂以玉笛按之非天樂也曲名霓裳羽衣  
後傳于樂部樂苑曰霓裳羽衣曲開元中  
西涼府節度楊敬述進鄭愚曰玄宗至月  
宮聞仙樂及歸但記其半會敬述進婆羅  
門曲聲調相符遂以月中所聞為散序敬  
述所進為曲而名霓裳羽衣也白居易曰  
霓裳法曲也其曲十二遍起於開元盛于

天寶凡曲將終聲拍皆促唯霓裳之末長  
引一聲故其歌云繁音急節十二遍唳鶴  
曲終長引聲是也按王建辭云弟子部中  
留一色聽風聽水作霓裳劉禹錫詩云三  
鄉陌上望仙山歸作霓裳羽衣曲然則非  
月中所聞矣

弟子部中留一色聽風聽水作霓裳散聲未足重來授  
直到牀前見上皇

中管五弦初半曲遙教合上隔簾聽一聲聲向天頭落  
效得仙人夜唱經

自直梨園得出稀更番上曲不教歸一時跪拜霓裳徹  
立地堦前賜紫衣

旋翻新譜聲初足除却梨園未教人宣與書家分手寫  
中官走馬賜功臣

伴教霓裳有貴妃從初直到曲成時日長耳裏聞聲熟  
拍數分毫錯總知



弦索撚撚隔綵雲五更初發一山

一作滿宮

聞武皇自送西

王母新換霓裳月色裙

敕賜宮人澡浴回遙看美女院門開一山星月霓裳動

好字先從殿裏來

傳呼法部按霓裳新得承恩別作行應是

一作日晚

貴妃樓

上看內人昇下綵羅箱

朝元閣上山風起

一作風初起

夜聽霓裳玉露寒宮女月中

更替立黃金梯滑並行難

知向

一作在

華清年月滿山頭山底種長生去時留下霓

裳曲總

一作半

是離宮別館聲

柘枝詞

樂府雜錄曰健舞曲有柘枝軟舞曲有屈

柘樂苑曰羽調有柘枝曲商調有屈柘枝

此舞因曲為名用二女童帽施金鈴拊

一作

旋轉有聲其來也於二蓮花中藏花坼而

後見對舞相占實舞中雅妙者也教坊記

曰凡棚車上擊鼓非柘枝則阿遼破也羯鼓錄曰凡曲有意盡聲不盡者須以他曲解之如耶婆色雞用屈柘急遍解屈柘用渾脫解之類是也一說曰柘枝本柘拔舞也其後字訛為柘枝沈亞之賦云昔神祖之克戎賓雜舞以混會柘枝信其多妍命佳人以繼態然則似是戎夷之舞按今舞人衣冠類蠻服疑出南蠻諸國者也

將軍奉命即須行塞外領彊兵聞道烽烟動腰間寶劍匣中鳴

同前三首

薛能

同營三十萬震鼓伐西羌戰血黏秋草征塵攬夕陽歸來人不識帝里獨戎裝

懸軍征拓羯內地隔蕭關日色崑崙上風聲朔漠間何當千萬騎颯颯貳師還

意氣成功日春風起絮天樓臺新邸第歌舞小嬋娟急

破催搖曳羅衫半脫肩

屈柘詞

溫庭筠

楊柳縈橋綠玫瑰拂地紅繡衫金駉裊花髻玉瓏璫宿  
雨香潛潤春流水暗通畫樓初夢斷晴曉一作日照湘風

散樂附

周禮曰旄人教舞散樂鄭康成云散樂野  
人為樂之善者若今黃門倡即漢書所謂  
黃門名倡丙彊景武之屬是也漢有黃門

鼓吹天子所以宴羣臣然則雅樂之外又有宴私之樂焉唐書樂志曰散樂者非部伍之聲俳優歌舞雜奏秦漢已來又有雜伎其變非一名為百戲亦總謂之散樂自是歷代相承有之

俳優辭

古辭

一曰侏儒導自古有之蓋倡優戲也說文曰俳優也穀梁曰魯定公會齊侯於夾谷

罷會齊人使優施舞於魯君之幕下范甯  
云優俳施其名也樂記子夏對魏文侯問  
曰新樂進俯退俯俳優侏儒撝雜子女王  
肅云俳優短人也則其所從來亦遠矣南  
齊書樂志曰侏儒導舞人自歌之古辭俳  
歌八曲前一篇二十二句今侏儒所歌撝  
取之也古今樂錄曰梁三朝樂第十六設  
俳技兒以青布囊盛竹篴貯兩蹠子負

東寫地歌舞小兒二人提沓踈子頭讀俳  
云見俳不語言俳澀所俳作一起四坐敬  
止馬無懸蹄牛無上齒駱駝無角奮迅兩  
耳半拆薦博四角恭跼隋書樂志曰魏晉  
故事有侏儒導引隋文帝以非正典罷之  
俳不言不語呼俳喻所俳適一起狼率不止生拔牛角  
摩斷膚耳馬無懸蹄牛無上齒駱駝無角奮迅兩耳

宋鳳凰銜書伎辭




隋書樂志曰鳳凰銜書伎自宋齊已來有  
之三朝用之南齊書樂志曰蓋魚龍之流  
也元會日侍中於殿前跪取其書以授舍  
人舍人受書升殿跪奏宋世有辭齊初詔  
江淹改造至梁武帝普通中下詔罷之  
大宋興隆膺靈符鳳鳥感和銜素書嘉樂之美通玄虛  
惟新濟濟邁唐虞巍巍蕩蕩道有餘

齊鳳凰銜書伎辭

皇齊啟運從瑤璣靈鳳銜書集紫微和樂既洽神所依  
超商卷夏耀英輝永世壽昌聲華飛



樂府詩集卷五十六



總校官進士臣胡榮

校對官編修臣裴謙

謄錄監生臣鄭嶠